

JESUS EDI KPUKPRU SE NNYIN IYOMDE

Ñwed Mbon Colossae 1:9-29; 2:8-19.

ỌYỌHỌ UKPEP-ÑKPỌ 410

Eke Mkparawa

IKỌ IBUOT: “Afo akanam enyọñ ye isọñ ke akwa odudu fo, ye ke edimenere ubọk fo, baba ñkpọ kiet inyuñ isọñke ikan fi” (Jeremiah 32:17).

Eti Asaña-utom

Ke usuhọre una-isọñ inyañ Lycus ke Asia Minor, odu nditọ Abasi emi ekeduñde obio inyene kiet emi ekekerede Colossae. Eti asaña-utom mmọ ekekerede Epaphras, emi akadade ofuri esit akpanikọ ọbọñ akam ye mmọ oyom edidiọñ ye ofuri uduak Abasi ke otu mmọ.

Ukwañ ukpep-ñkpọ ama oduk ke otu mbon Colossae, edi ke ini Epaphras okokutde ete ke mme anditiene-Christ emi ekedu ke idiọk itie ndikpọñ akpa mbuqtidem emi mmọ ekenyenede ke Christ, enye ama ekere eti-eti. Ke ini Epaphras akanamde anyan isañ ke mmọñ man osobo ye Paul ke obio Rome, enye ama emen unana ufọk-Abasi Colossae onim Paul ke iso.

Utom Abasi

Paul okodu ke ufọk-ñkpọkọbi nte owo-ñkpọkọbi, emi ekekọbide edian ye owo-ekọñ ete ekpeme enye, edi owo ikọkọbikẹ Spirit esie. Enye ama enyene unen ke ñkañ Abasi, Abasi ñko ama asiak usuñ ọnọ enye ndibọ ufọk ukpe okuk nduñ emi ọkọnọde enye ifet ndikpep mmọ emi ekedide etiene enye mbaña Jesus. Ekeme ndidi ke ufọk emi ke Paul ekewet ediwak ñwed emi edide ñkpọ nsọñọ-idem ye uñwam ọnọ mme anditiene-Christ ke kpukpru ebiet.

Yak nnyin ise uwem Paul ke abaña utom Abasi ke ini nnyin idomode ndifaña ite nnyin ikemeke ndinam emi me oko ke utom Eti-Mbuk. Okposuk edi me nnyin ikopke nsọñidem, minyuñ inyeneke ñkpọ, me nnyin inyeneke ediwak nda-mmama enọ, edi nnyin imenyene ndọñ-esit ke itide Paul. Enye ama enyene mme udọñọ ke ikpohidem, ikonyuñ inyeneke okuk ke ebede se enye ekenyenede oto ubọk-utom esie ke edidọk ufọk-ọfọñ ye se mme ufan ekesinọde enye. Ke ini kiet ko enye ekedi anam-idiọk, edi enye ekenyene ukeme ndinam utom Abasi oto koro enye akayakde uwem esie ọnọ Ọbọñ nnyin Jesus Christ. Nnyin ñko ke uñwam Abasi, imekeme ndinam kpasuk ntre.

Ifiọk Abasi

Epaphras ama etiñ ọnọ Paul abaña mbuqtidem emi mbon Colossae ekenyenede ke Christ Jesus ye ima emi mmọ ekenyenede enọ kiet eken, ọkọrọ ye odu-uwem idorenyin emi mmọ ekenyenede ke abaña Heaven. Ke ini Paul okokopde eti etop emi abañade ima ye mbuqtidem mmọ, enye ama ọbọñ akam abaña mmọ. Enye ama ewet ọnọ mmọ ndinyik mmọ ndibọñ akam nnọ Jesus nyom uñwam.

Se ikebehede Paul ke akpa ifet ekedi nte mme anditiene-Christ emi ke Colossae ekpefiokde uduak Abasi enyuñ enyenede ifiọk Abasi nte eyararede ke Ñwed Abasi. Enye ọkọbọñ akam nte mmọ ekpenyenede ifiọk ke ñkpọ Spirit. Ndifiok uduak Abasi nnyuñ nnam eyeñwam mmọ ndisaña nnyuñ ndu uwem nte nti mme anditiene-Christ, nnyuñ ndi ñkpọ ukpono ye edidiọñ nnọ Eti-mbuk. Ukem oro ke edi mfin emi, edieke mbufo mkparawa iban ye iren emi edide mme anditiene-Christ efiokde uduak Abasi enyuñ enamde, eyeñwam mbufo ndidu uwem eke enemde Abasi esit ke kpukpru usuñ.

Nsinsi Uwem

Paul ọkọbọñ akam nte nditọ Colossae emi ekpeñwumde mfri ke kpukpru nti utom, emi ọwọrọde ete ke mmọ ekpena eda ifet ke kpukpru ini ndinam utom nnọ Abasi. Enye ọbọñ akam nte mmọ ekpekoride ke ifiọk Abasi enyuñ etimde ekpep ebaña Enye. Nte afo ọmọfiok akwa utip emi odude ke ndinyene ifiọk Abasi? Enye ada nsinsi uwem edi, koro Jesus ke Idem Esie ọdọhọde ke akam emi Enye ọbọñde ọnọ Ete ete “Ndien nsinsi uwem oro edi ndifiok fi, ata Abasi kierakiet ye Enye emi afo ọkọdọñde, kpa Jesus Christ” (John 17:3).

Nnyin ifiok ibaña Abasi ke ini nnyin idide nditọwọñ. Ndien usen eyedi eke Abasi esinde ubiom-ikpe ke esit nnyin ke abaña nnam-ndue nnyin. Edieke nnyin isude nsu, inyuñ iyatde esit, imia eyen eka nnyin eren-owo, Abasi anam nnyin idiọñọ ite ke nnyin imedue. Enye oyom nnyin

ibon akam ibene enye efen onyuan anyana nnyin. Ke ini nnyin ikponde ikem ndikot nnyuan mfiok mme nkpọ emi edude ke Nwede Abasi, nnyin ikot ite Abasi ama nnyin onyuan onọ edima Eyen esie kierakiet edikpa onọ nnyin. Nnyin ikot ite ke Abasi ofon ido; Enye edi eti Abasi onyuan ekpeme nnyin kiet-kiet ke mbom. Nnyin ikpep ibana mfonido Abasi oto ke se nnyin isanade ibe ke esit. Ke ini nnyin idude ke afanikon nnyin ibon akam ndien Abasi anwam nnyin.

Oto ke ubiom-ikpe idiok-nkpọ, erinyana ukpon, edikot nnyuan nkpep nto Nwede Abasi ye se isanade ibe ke esit, enam mme ifiok Abasi nnyin ekori.

Anyan-ime Ye Idaresit

Paul ama obon akam nte mmọ ekpesonode eme anyan ime. Ke otu mme ukpep nkpọ Jesus, kiet etin ete “edida erime ime ke ukut ebọ ukpon mbufo eda enyene” Luke 21:19), nnyin ikpep ibana edime ime nte akpan nkpọ kiet ke uwem anditiene-Christ. Nnyin inyene ndiyọ kpukpru se isimde nnyin ke ime; nnyin inyene ndime anyan ime ye mme ufan nnyin ye mme iman nnyin nko.

Ke ini utom fo misanake ofon, ke ini mbufo nditọ iren ekade iso ndibop mme ufok inuen ndien hammer efibede edimia fi ke nnuen-ubok; mme nte ukwak eke ekonde mimumke ofon, edieke akam Paul osude ke uwem fo, afo eyedu ke ifure ye inem. Ke ini mme ufan minyimeke ndinwam, ye mme ufan ufok-nwede etinde nsu-nsu ikọ edian fi, bon akam bana mmọ. Edieke kpukpru ini mme nkpọ emi esuk eka iso idiok-idiok, ndien afo utuaha idem fo mbom, afo okpokop idaresit onyuan okom Abasi nte uwem fo ekemede ndidi nkpọ ukpono nnọ Abasi ye utom Eti-mbuk.

Andinyaña Nnyin

Jesus edi ntono ye utit erinyana nnyin. Enye edi ntono ke ini Enye efende onyuan adade utibe Iyip Esie ofuk ndudue nnyin. Enye edi utit ye andinam erinyana nnyin oyohọ ke ini Enye edidide ke ikpa enyon nditan nnyin man ikodu ye Enye ke nsinsi.

Jesus edi mbiet Abasi Ete emi nnyin mikwe ke enyin. Jesus ama osuhore edi ke mbiet owo ke usin udia ufene ke Bethlehem (Mme Hebrew 1:6). Enye ama odu uwem, onyuan asana ke ison Palestine, onyuan akpa ke kros, eset ke mkpa, onyuan odok ke Heaven. Nnyin imofik nte Jesus etiede koro mmọ oro eke enye okoduinde ye mmọ ke ini odude ke ison ema ewet ebana enye, nnyin imokot ke nwede Abasi. Abasi etie ukem-ukem nte Jesus, ofon ido, atua mbom onyuan enyene ima (Mme Hebrew 1:3).

Andibot

Jesus edi akpa ke kpukpru se ekebotde. Oro edi, Enye ama odudu mbemiso ebote owo. Jesus ama ododu ke eriton. Edi ndibe nkpọ. Nnyin ikemeke nditim mfiok nkpọ emi, edi nnyin inim ke akpanikọ koro Nwede Abasi etin ntre. Jesus okodu ye Abasi ke ini ebote ererimbot, onyuan odu ye Abasi obot ofuri nkpọ (Mme Hebrew 1:10; John 1:3). Enye okobot kpukpru nkpọ eke edude ke enyon ye eke edude ke idak ison, utin ye ofion, ntata-ofion, mbiet ye eto; mme awawa ikon, mme unam ikot ye kpukpru se idude uwem. Edi Enye nko okobot mme nkpọ eke owo mikwe, mme odudu ye mme ukara, mme ikpọ idut. Nnyin ikemeke ndikut odudu me ukara, edi nnyin imofik ite ke mmọ ededu. Kpukpru nkpọ emi edi Jesus okobot mmọ ke idem esie onọ inemesit Esie (Eriyarare 4:11), onyuan oto ke odudu Esie kpukpru nkpọ eka iso edu otọ kiet. Mme ifiok owo ke abana eriton ererimbot edu emi misanake nte Nwede Abasi ewetde, ke kpukpru se mme nwede emi etinde ebana, nnyin ifiok ite ke Nwede Abasi etin akpanikọ (Nwede Mbon Rome 3:4).

Ibuot Kpukpru Nkpọ

Jesus edi Ibuot Ufok-Abasi nko. Ufok-Abasi oro idighe enye emi ebopde emi nnyin isidukde ikpono Abasi. Edi Ufok-Abasi eke owo mikwe ke enyin emi ebopde eto mmọ emi Abasi anyanade. Edi Ufok-Abasi eke mmọ emi edide ikpan eke ewetde enyin mmọ ke Heaven (Mme Hebrew 12:23). Afo ekere ete ke ama enem Abasi ndibem iso nwuk Jesus nte ata akpa, Andikpon-nkan ye Ibuot kpukpru nkpọ? Ntak edi koro Jesus ama ebebe idem ndikpa, nnyuan nduok Iyip Esie ke Eto mkpa man uduak Abasi ke abana edifak owo osu. Udon Abasi edi nte kpukpru owo ye kpukpru nkpọ otonode ke mbiet tutu osim unam ekpetonode ntak enyene ebuana ye uduak Esie ke abana ererimbot nte ekedide ke Inwan Eden. Jesus ama anam emi edi ntre ke ini Enye akakpade ke abana mme idiok-nkpọ nnyin.

Emen Mme Anana-Ndudue Ewut

Mbon Colossae emi ke ini kiet ko ekedide nta mme anam-idiok eyedi se edade esin ke inem-inem nsaña ye Abasi oto ke mkpa Jesus Christ ke kros. Ke ini ama ekem emi mmọ edinamde ibat uwem mmọ, Jesus eyeda mmọ owut Abasi nte mmọ emi enanade ndudue edieke mmọ ekade iso ke Eti-mbuk. Enye eyenam ukem oro ọnọ nnyin edieke nnyin isuhode ke erinyaña nnyin inyuñ isoñode ida ke Eti-mbuk Jesus. Ke itie efen, Nwede Abasi ọdọhọ ete ke Jesus emi “ekemede ndikpeme mbufo, ete, ekuduọ, ndinyuñ nnam mbufo eda ke iso Ubọñ Esie ke akwa idaresit, enana ndo” (Jude 24).

Idorenyin Eti-mbuk

Paul ama ekpep mmọ ete ke akpana mmọ enyene nsọño-nda ye iwuk ke mbuotidem, ekunyuñ ewoñode ekpọñ idorenyin Eti-Mbuk. Nso idi idorenyin Eti-Mbuk? Edi idorenyin nte ke usen kiet iyedu ke Heaven ndibuana ke ubọñ emi Jesus enyenede ye Ete Esie. Paul ama ọdọhọ ete Jesus ndidoduñ ke ikot esie emi enyañade edi utibe-ñkpọ. Nnyin ke akpanikọ ikemeke ndifiok nte Jesus asañade oduñ ke esit nnyin, edi nnyin ifiok ite ke Enye ododuñ koro nnyin ikokop Spirit Esie ke idem nnyin. Edieke nnyin inimde esit iñwañ ntre Jesus ekeme ndiduñ do kpukpru ini, ndien ke usen kiet nnyin iyedu ke Heaven ye Enye.

Ukwañ Ukpep-ñkpọ

Nwede-etop Paul ama oduri mbon Colossae utọñ abaña ndikpeme mbon emi edomode ndiwọñore mmọ ñkpọñ mbuotidem mmọ ke Christ, enyuñ edomode ndinam mmọ enyene iberedem ke ifiok owo, me ekikere owo, ye ido, emi mme owo enimde ke akpanikọ ete ekeme ndinyaña ukpọñ owo. Ediwak owo imaha ndisuhore idem man oto do ekeme ndisaña ke usuñ erinyaña Abasi, usuñ emi, “aka iso ayama tutu osim ufot uwemeyo” (Mme Nke 4:18); edi mmọ emek usuñ mmọ emi adade mmọ esim ekim ye ndutime.

Ehuri mme anditiene-Christ utọñ saña-saña ebaña mmọ emi etiñde ete ke nnyin inyene ndisaña ke mme ido ye edinam eke Ibet Moses, ke ini Nwede Abasi ọdọhọ ete, “koro ikpe iditebeke baba owo kiet ke iso Esie kabaña edinam utom ibet” (Nwede Mbon Rome 3:20). Eduri nnyin utọñ ebaña mmọ emi ekañde idaha Jesus nte Eyen Abasi emi ekedide ke ererimbot ndikpa nnyuñ nset ke mkpa man anyaña nnyin esio ke idiok-ñkpọ nnyin, ke ini Nwede Abasi ọdọhọ ete “owo ekededi eke edinyimede ete Jesus edi Eyen Abasi, Abasi ododuñ enye ke esit, enye onyuñ oduñ ke Abasi” (1 John 4:15). Eduri nnyin utọñ ke abaña mmọ emi edọhọ ete idiok-ñkpọ iduhe ndien ke Satan edi idiok ekikere, ke ini Nwede Abasi ọdọhọ ete, “Kpukpru ukwañ ñkpọ edi idiok-ñkpọ” (1 John 5:17), ñko, “Asua mbufo, kpa Satan ke oyoyo nte lion eke okunide oyom se editade” (1 Peter 5:8). Enọ nnyin ntọt ñko ebaña mmọ emi ebuotde idem ke utre-udia ye mmọ emi midiahadia ndusuk udia me edisiñede idem, me ndikama ikọ Abasi ke ibuot eyeda utip edi, ke ini Nwede Abasi ọdọhọ ete, “koro Ubọñ Abasi idighe edidia-ñkpọ ye ediñwoñ ñkpọ edi edi edinen ido ye emem ye idaresit emi odude ke Edisaña Spirit” (Nwede Mbon Rome 14:17); ñko “koro erisin idem mbet ñkpọ ikpohidem enyene esisit udori; edi uteñe Abasi ọwọrọ udori ke kpukpru usuñ, koro uñwoñọ uwem emi odude ke emi ye eke uwem emi edidide asañade ye enye” (1 Nwede Timothy 4:8). Ke akpatre ikọ enọ nnyin item ebaña mmọ emi midaha Christ nte “Ibuot, emi adade ikek ye osip ọbọk ofuri idem, omum enye akama adiana, anam enye ọkọri-ñkọri uwem Abasi.”

MME MBUME

- 1 Nso ke Paul ọkọbọñ akam oyom mme anditiene-Christ ke Colossae ndinyene?
- 2 Nso ñkpọ iba ke enye ọkọbọñ akam oyom Abasi ada ọsọñọ mmọ idem?
- 3 Jesus edi mbiet anie?
- 4 Jesus Christ okodu ye anie ke ini emi ekebotde kpukpru ñkpọ?
- 5 Nso edi ntak emi Abasi Ete akanamde Jesus edi akpa ke Ibuot kpukpru ñkpọ?
- 6 Nso edi ndibe-ñkpọ Eti-Mbuk?
- 7 Mme anie ke Paul ọkọdọhọ mbon Colossae ekpeme?
- 8 Nso edi ifiok owo? Nso edi edu unam ñkpọ mme owo?
- 9 Anie edi Ibuot ọnọ mmọ emi enimde Christ ke akpanikọ?